

GRATIS

AWE
Mainta

e corant di Toko

HOBENNAN DI FORMACION SOCIAL A HAYA BISHITA DI MINISTER HULANDES

HANS HILLEN





Hobennan di Formacion Social a haya bishita di Minister Hulandes Hans Hillen

E mandatario Hulandes a keda impresiona cu prestacion di e hobennanform



MINISTER demisionario di Defensa Hulandes Hans Hillen ta na Aruba pa un bishita cortico. Den oranan di diarazon mainta el a wordo ricibi pa Prome Minister di Aruba Mike Eman den su oficina. Nan ta amigo di curason di basta tempo caba.

Durante e bishita aki nan a papia riba e relacion di Reino cu manera Hillen a califik'e ta uno estupendo.

Merdia Minister Hillen y su delegacion consistiendo di e.o. Comandante di region Caribense Brigada General Swijman,

Comandante di MariniersKazerne Savaneta Hofma, Capitan Werleman y Jessey Ras di e trayecto Formacion Social a bay Mariniers Kazerne Savaneta. Un di e metanan di su bishita eynan ta pa Minister Hillen topa cu e di dos grupo di hoben cu algun siman pasa a cuminsa cu e training di Formacion Social. Minister Hillen a papia cu e hobennan y a muestra masha hopi interes den nan adelanto.

E hobennan di nan banda a aprecia masha tanto e atencion duna na nan cu e bishita special aki. Atardi Minister Hillen a bay na APA (Aruba Ports Authority) compana pa Prome Minister Eman p'eyan topa cu e grupo

di 6 hoben cu ta coriendo stage den e compania portuario aki. Prome cu esaki Director di APA, sr. Alfonso Boekhoudt a duna Minister Hillen, Minister Presidente Eman y e delegacion un splicacion encuan to e trabou cu e hobennan di Formacion Social ta haciendo cerca nan. El a splica cu nan ta masha contento cu e 6 hoben aki ya cu nan ta haciendo un bon trabou. Nan ta trahando na Departamento di Seguridad di APA cu ta uno masha estricto na unda nan ta participa den tur trayecto di e trabou di seguridad.

"Nos ta satisfecho cu nan forma di traha y ya caba nos ta hayando yamada di companianan

priva cu kier e hobennan aki pa traha pa nan ora nan periodo di stage caba cerca nos. E companianan aki sa cu na APA nan ta wordo bon entrena y esaki ta habri perspectiva p'e hobennan aki". Alfonso Boekhoudt a bisa tambe cu presencia di e grupo di 6 aki ta pone cu su hendenan trahando den seguridad ta mas atento y skerpi den nan trabou. Esaki sigur ta un punto di bentaha.

Despues di e presentacion Minister Hillen y Eman a bay mira e 6 hobennan den accion. Nan tabata trahando na porta controlando e autonan cu ta subi tereno di waf, para dilanti di e terminal crucero y controlando riba e tereno di waf haciendo nan trabou di seguridad. Minister Hillen a papia cu cada un di nan apart pa puntra nan con nan ta experencia e trabou y tur a bisa di ta contento y agradecido cu e oportunidad aki brinda na nan. Minister Hillen a keda impresionada cu loke a logra den un periodo relativamente cortico cu e hobennan aki cu t'asina dedica na nan trabou. Formacion Social ta un proyecto na cua Hulanda ta duna su ayudo grandemente.